

Polazeći od Sporazuma o saradnji između Vijeća/Savjeta ministara BiH i nevladinog sektora u BiH i zaključaka usvojenih na konferenciji: „Jačanje demokratske kulture dijaloga i saradnje institucija vlasti i civilnog društva u BiH – Primjena Sporazuma o saradnji Vijeća/Savjeta ministara BiH i NVO sektora u BiH“, održane 31.03.2009.godine,

u želji da preuzmu odgovornost za utvrđivanje potreba i interesa građana i kreiranje javnih politika usmjerenih ka njihovoj realizaciji,

u cilju podsticanja razvoja civilnog društva i dobre uprave u Bosni i Hercegovini kroz međusobni dijalog i saradnju organa vlasti, privatnog sektora i civilnog društva,

zainteresovani predstavnici organizacija civilnog društva okupljeni u Mrežu „Sporazum plus“ kao dugoročan dokument donose:

POVELJU MREŽE „SPORAZUM PLUS“

Mreža „Sporazum plus“ je otvorena aktivistička struktura koju čine slobodne, djelujuće organizacije i druge asocijacije civilnog društva u Bosni i Hercegovini .

Misija, ciljevi i djelovanje Mreže „Sporazum plus“ zasnovani su na dostignućima koalicije: „Raditi i uspjeti zajedno“.

*Ideja o osnivanju Mreže rezultat je općeprihvaćenog stava da je uspjeh sveukupnih reformi i brže uključivanje BiH u evropske integracije moguće samo kroz *udruživanje svih resursa kojima raspolaže vlada, privatni sektor i civilno društvo u BiH i njihov zajednički, koordinirani rad.**

*Vrijednosti, principi djelovanja i organizaciona struktura Mreže „Sporazum plus“, definisani u ovoj Povelji ostavljaju prostor za stalnu dogradnju i unapređivanje u skladu sa razvojnim potrebama i zahtjevima. Djelovanje Mreže „Sporazum plus“ ne dovodi u pitanje postojeće dobre prakse međusektorske saradnje uspostavljene na različitim nivoima vlasti, različitim teritorijalnim, podsektorskim, interesnim ili drugim osnovama u BiH. Djelovanje Mreže „Sporazum plus“ potvrđuje značaj međusektorske saradnje na svim nivoima, u funkciji je osiguranja *kontinuiteta i održivosti* ove saradnje, te u funkciji jačanja kapaciteta svih aktera uključenih u ovaj proces.*

Osnovne vrijednosti i principi djelovanja

Svoje djelovanje Mreža „Sporazum plus“ zasniva na sljedećim vrijednostima i principima:

- 1. Mreža „Sporazum plus“ je otvorena za sve organizacije civilnog društva i druge asocijacije koje prihvataju zajednički utvrđene vrijednosti, misiju, principe i ciljeve iz ove Povelje i drugih dokumenata koji su rezultat zajedničkog odlučivanja i djelovanja;*
- 2. Rad mreže je javan. Odnosi unutar mreže se zasnivaju na principima demokratičnosti i transparentnosti;*
- 3. Mreža će djelovati u interesu svih građana, svih naroda i nacionalnih grupa, ravnajući se prema principu javnog dobra i principima dobra za svakog pojedinca, građanina BiH;*
- 4. Članice Mreže su nezavisne u svom djelovanju, zadržavaju pravo da samostalno grade i razvijaju programe, partnerstva i dijalog u oblastima vlastitog djelovanja. Mreža će promovisati i podržavati ovo njihovo pravo, kao i sve njihove aktivnosti koje su u skladu sa vrijednostima i principima iz ove Povelje;*
- 5. Odnosi među članicama počivaju na uzajamnom uvažavanju i dijalogu, nenasilnom rješavanju sporova i nesporazuma, te na razvoju solidarnosti, u mjeri u kojoj je to moguće, o svim pitanjima iz djelokruga njenog javnog djelovanja ;*

6. Mreža ne polaže pravo na ekskluzivno predstavljanje interesa cjelokupnog nevladinog sektora u BiH, već predstavlja oblik povezivanja slobodnih subjekata, koji na ovaj način žele afirmirati vlastite interese i potrebe te doprinijeti realizaciji zajedničkih ciljeva i oživotvorenju misije civilnog društva u BiH;
7. Mreža će sarađivati sa svim drugim društvenim akterima na promociji i ostvarivanju zajedničkih ciljeva i vrijednosti.

Vizija

Bosna i Hercegovina kao otvoreno i demokratsko društvo u kojem predstavnici vlade i civilnog društva rade zajednički kroz dijalog i partnersku saradnju za dobrobit svih njenih građana i građanki, naroda i nacionalnih grupa.

Misija

Podrška sveukupnim reformama u BiH i bržem uključivanju BiH u evroatlanske integracije kroz aktivan međusektorski rad i djelovanje vlasti, civilnog društva i privatnog sektora.

Osnovna svrha

Stvaranje uslova za kontinuirani razvoj civilnog društva i dobre uprave u BiH u skladu sa potvrđenim demokratskim principima i vrijednostima.

Osnovni ciljevi

1. Izgraditi optimalno formalno pravno i političko okruženje za djelovanje i razvoj mreže i civilnog društva u Bosni i Hercegovini;
2. Upostaviti autentične moduse kontinuirane međusektorske saradnje zainteresovanih subjekata civilnog društva i vlade na državnom i ostalim nivoima;
3. Ojačati korektorsku ulogu mreže i drugih subjekata civilnog društva u odnosu prema političkoj, ekonomskoj, obrazovnoj i drugim sferama na svim nivoima u BiH;
4. Afirmisati aktivistički imidž i djelovanje mreže i drugih subjekata civilnog društva u javnosti potvrđujući njihovu poziciju stvarnog glasnogovornika građanstva i medijatora između građanstva i političke sfere;
5. Afirmisati princip supsidijarnosti u raspodjeli društvenih funkcija gdje god je to moguće i u mjeri u kojoj je moguće;
6. Uspostaviti kontinuitet javnog djelovanja mreže kroz javne forume ili na način koji odgovara autentičnim društvenim, političkim, ekonomskim, socijalnim i drugim zahtjevima ovdašnjeg ukupnog okruženja.
7. Doprinijeti ulasku BiH u EU i njenoj izgradnji kao stabilne države te daljoj izgradnji civilnog društva u BiH skladu sa autentičnim zahtjevima ovdašnjeg okruženja, a u duhu univerzalnih civilnih principa i vrijednosti.

Svoju viziju i misiju Mreža „Sporazum plus” ostvaruje kroz sljedeće aktivnosti:

1. Zagovaranje javnih politika usmjerenih na izradu i usvajanje novih zakona i sporazuma, definiranje strategija i oživotvorenje praksi koje su od značaja za civilno društvo i dobro upravljanje u BiH;
2. Informisanje javnosti, promociju i monitoring provođenja zakona, strategija i onih javnih politika kojima se utiče na civilno društvo i dobro upravljanje u BiH;
3. Kontinuirano promovisanje “Sporazuma o saradnji između Vijeća/Savjeta ministara BiH i nevladinog sektoru BiH” i jačanje kapaciteta za njihovu primjenu;
4. Podrška osnivanju i jačanju sličnih mreža na svim nivoima vlasti;
5. Uspostavljanje mehanizama za intenzivnu razmjenu informacija i iskustava među članicama Mreže;
6. Uspostavljanje kontakata i razvoj saradnje sa sličnim mrežama i asocijacijama na regionalnom, prekograničnom i transnacionalnom planu;
7. Podsticanje procesa umrežavanja unutar pojedinih sektora, različitih oblasti rada i djelovanja civilnog društva i podrška njihovoj saradnji sa drugim društvenim akterima;
8. Podsticanje međusektorske saradnje i pružanje podrške partnerstvima na razvojnim programima EU;
9. Organizaciju javnih foruma o svim pitanjima od značaja za realizaciju misije, vizije i ciljeva mreže ili interesa i potreba njenih članica/članova i drugih aktera civilnog društva ;
10. Organizaciju i realizaciju različitih formi demokratske borbe i zalaganja za legitimne ciljeve u skladu sa civilnim principima i vrijednostima.

Komunikacijska strategija Mreže „Sporazum plus”

Mreža „Sporazum plus“ će u početku svog djelovanja biti fokusirana na povezivanje, umrežavanje i međusobno informisanje svojih članova, s ciljem povećanja članstva, i pojačanog (zajedničkog i pojedinačnog) prisustva u javnosti članova mreže.

Mreža će, uz to, kontinuirano provoditi aktivnosti sa ciljem informisanja svih relevantnih društvenih aktera i bh javnosti o svom formiranju i početku rada, osnovnoj misiji, ciljevima svog djelovanja i sl.

U tu svrhu, Mreža će koristiti sljedeće osnovne oblike i pravce komunikacije: (1) komunikacija unutar Mreže; (2) komunikacija prema članovima vlade i drugih državnih organa, poslovnog sektora i OCD koje nisu članovi Mreže, i (3) komunikacija prema medijima i javnosti uopšte.

Komunikacijska strategija je zaseban dokument mreže.

Članstvo u Mreži „Sporazum plus”

Članstvo u Mreži „Sporazum plus” je otvoreno za sve organizacije civilnog društva, mreže, koalicije i druge tipove asocijacija u BiH koje su:

- Posvećene trećem sektoru i vrijednostima civilnog društva, kao što su tolerancija, ljudska prava i poštivanje različitosti;
- Posvećene ne-diskriminaciji na osnovu etničke, nacionalne, religijske, spolne, seksualne, statusne ili razlike po fizičkim sposobnostima;
- Nisu uključene u bilo kakve misionarske ili aktivnosti u svrhu preobraćenja.

Od članova Mreže se očekuje aktivno sudjelovanje u ostvarivanju osnovnih programskih ciljeva Mreže a ne samo formalno članstvo. Članom mreže postaje se potpisivanjem izjave o prihvatanju misije, vizije, vrijednosti, principa djelovanja i osnovnih ciljeva mreže iz ove Povelje te drugih dokumenata koji su u Mreži već usvojeni u trenutku potpisivanja izjave.

Člansvo u Mreži podrazumijeva prihvaćanja već usvojenih dokumenata nastalih tokom djelovanja koalicije „Raditi i uspjeti zajedno“ uz otvorenu mogućnost njihove dogradnje u skladu sa zahtjevima razvojnog procesa i ovom Poveljom.

U radu Mreže u svojstvu člana-posmatrača, bez prava glasa, mogu učestvovati predstavnici vlasti, međunarodnih organizacija i drugi zainteresirani subjekti ili privatna lica koji su angažovani na razvoju demokratije u BiH.

Proces osnivanja Mreže vodi Inicijativni odbor za osnivanje Mreže „Sporazum plus“ kojeg čine predstavnici članica koje su potpisale izjavu o pristupanju Mreži prije održavanja Osnivačke Konvencije.

1. Konvencija Mreže „Sporazum plus“

Konvencija Mreže je najviše tijelo odlučivanja Mrežom. Čine ga po jedan predstavnik/ca svake članice Mreže, kojeg/ju članice imenuju na period od dvije godine.

2. Koordinacioni odbor mreže

Koordinacioni odbor je tijelo koje koordinira radom Mreže između dvije Konvencije. Prijedlog za člana koordinacionog odbora može podnijeti svaka članica Mreže.

Koordinacioni odbor iz reda svojih članova bira koordinatora/cu i dva/dvije zamjenika/zamjenice sa mandatom od 2 godine.

Za svoj rad koordinacioni odbor odgovorana Konvenciji, kojoj podnosi izvještaj o svom radu.

Rad koordinacioni odbor biće regulisan Poslovnikom.

3. Sekretarijat

Usluge sekretarijata za potrebe Mreže „Sporazum plus“ obavljaju njene članice po principu rotacije svake dvije godine.

Struktura upravljanja, način rada i odlučivanja kao i sva druga pitanja vezana za djelovanje Mreže utvrđeni su Statutom, pravilnikom o radu, komunikacijskim planom kao zasebnim dokumentima Mreže.